




ხაშურის მთაშენი



№42 (243)

4 ნოემბერი, ორშაბათი,

2019 წელი



საკრებულოს სხდომა

29 ოქტომბერს, ადმინისტრაციული სახლის სხდომათა დარბაზში, გაიმართა ხაშურის მუნიციპალიტეტის საკრებულოს რიგგარეშე სხდომა, რომელსაც უძღვებოდა საკრებულოს თავმჯდომარე მიხეილ ჯანაშვილი. გადაუდებელი აუცილებლობიდან გამომდინარე, სხდომაზე სულ სამი საკითხი იყო წარმოდგენილი. ორი მათგანი ეხებოდა მუნიციპალიტეტის ქონების შემდგომი განკარგვის საქმეს, მესამე საკითხით კი ცვლილება შევიდა საკრებულოს მიერ 2018 წლის №114 განკარგულებაში. მერიის განათლების, კულტურის და სპორტის სამსახურის მიერ 2019 წელს განსახორციელებელი სპორტული, კულტურული და ახალგაზრდული ღონისძიებების პროგრამაში.

საკრებულოს მორიგი სხდომა ნოემბრის პირველ დღეებში გაიმართება.

სასარგებლო შეხვედრა გენდერულ საკითხებზე

29 ოქტომბერს, ხაშურის მუნიციპალიტეტის მერიის გენდერულ საკითხებზე პასუხისმგებელი პირი და გენდერული საბჭოს წევრი ნინო სუხიაშვილი სსიპ ილია ჭავჭავაძის სახელობის ქალაქ ხაშურის №3 საჯარო სკოლის VI კლასის მოსწავლეებს შეხვდა.

„სასკოლო საუბრები გენდერზე“ პროექტის ფარგლებში, ჯგუფის წევრები იმ საერთაშორისო თუ ადგილობრივ მექანიზმებს გაეცნენ, რაც ხელს უწყობს გენდერული თანასწორობის მიღწევას.

შეხვედრაზე იმსჯელეს CEDAW კონვენციის, გენდერული თანასწო-



რობის და ოჯახში ძალადობის აღკვეთის, ოჯახში ძალადობის მსხვერპლთა დაცვისა და დახმარების შესახებ საქართველოს კანონების თაობაზე.

მერიის წარმომადგენელმა მოსწავლეებს გააცნო სტატისტიკა, ხაშურის მუნიციპალიტეტის საკრებულოში და მერიაში დასაქმებული პირების შესახებ, რამაც ასევე დაინტერესება გამოიწვია. დაისვა კითხვები და გაიმართა საინტერესო დისკუსია.

შეხვედრის ბოლოს, პროექტის ხელმძღვანელმა პედაგოგმა ანა ძინძიბაძემ აღნიშნა, რომ მსგავსი ფორმატის შეხვედრები მნიშვნელოვნად შეუწყობს ხელს მოსწავლეებში გენდერულ საკითხებზე ცნობიერების ამაღლებას, აზრის სწორად ფორმირებას, შესაძლებლობების მეტად გააზრებას, მმართველობით სისტემებში მოსახვედრად, გოგონებისთვის მოტივაციის ამაღლებას, არგუმენტებული მსჯელობისა და ანალიზის უნარის განვითარებას.

მუნიციპალიტეტის მერი ბიოლოგიურ მეურნეობათა ასოციაცია „ელკანას“ და პროექტის „ზრდა“ წარმომადგენლებს შეხვდა

28 ოქტომბერს ხაშურის მუნიციპალიტეტის მერს გიორგი გურასაშვილს შეხვდნენ ბიოლოგიურ მეურნეობათა ასოციაცია „ელკანას“ და USAID-ის პროექტის „ზრდა“ წარმომადგენლები.

შეხვედრის მიზანს წარმოადგენდა „ადგილობრივი მოსახლეობის განვითარების ინიციატივა - მცირე ბიზნესის განვითარების პროექტი 3-ის“ მიმდინარე შედეგების წარდგენა და ახალი კონკურსის გამოცხადება.

პროექტის მიზანია დასავლეთის მიმართულების საექსპორტო მილსადენის გასწვრივ მდებარე თემების კეთილდღეობის გაუმჯობესება ბიზნესის წამოწყების

ხელ შეწყობის საშუალებით. აღნიშნული პროექტი ხელს შეუწყობს მოსახლეობის ეკონომიკური მდგომარეობის გაუმჯობესებას, ასევე BP-ის, მის პარტნიორებს და USAID-ის პროექტს „ზრდა“, თემებთან პარმონიული ურთიერთობების ჩამოყალიბებაში დაეხმარება. პროექტი ხორციელდება:

გარდაბანის, მცხეთის, კასპის, გორის, ქარელის, ხაშურისა და სანხერეს მუნიციპალიტეტების იძულებით გადაადგილებული პირთა 4 დასახლებაში და 56 სოფელში, რომელთა შორის ხაშურის მუნიციპალიტეტის 13 სოფელია.

მიზნობრივი სოფლების მოსახლეობისთვის გამოცხადდა კონკურსი, რომლის შესახებაც დეტალური ინფორმაცია შეგიძლიათ იხილოთ „ელკანას“ ვებგვერდზე www.elkana.org.ge

შეხვედრამ ნაყოფიერად ჩაიარა და მერმა აღნიშნულ პროექტს მხარდაჭერა და თანადგომა აღუთქვა.



ადმინისტრაციულ სასაზღვრო ზოლიდან მდებარე სოფლების ქალები ხელისუფლების წარმომადგენლებს შეხვდნენ

2019 წლის 25 ოქტომბერს, სასტუმრო „თბილისი მერიოტში“, არასამთავრობო ორგანიზაცია „ქალთა საინფორმაციო ცენტრმა“ გამართა შემოქმედებითი შეხვედრა/ტრენინგი „უკუკავშირი გამყოფ ხაზთან მდებარე ხაშურის მუნიციპალიტეტის წადვლის თემის (სოფლები ჩორჩანა და წადვლი) მოსახლეობასა და საქართველოს ხელისუფლების წარმომადგენლებს შორის“.

შეხვედრაზე წარდგენილი იყო გამყოფ ხაზთან მდებარე წადვლის თემის სოფლების ჩორჩანასა და წადვლის მოსახლეობის საჭიროებათა კვლევისა და თემში მოქმედი ქალთა საინიციატივო ჯგუფების სამუშაო დოკუმენტის პრეზენტაციები. ასევე განხილული იქნა კვლევის შედეგად გამოვლენილი პრობლემური საკითხების ადვოკატირების შედეგები და ამ მიმართულებით შემდგომი ნაბიჯების დაგეგმვა.

შეხვედრაზე ასევე განიხილეს გაეროს ქალთა ორგანიზაციის „ღია კარის დღეზე“ წადვლის თემის წარმომადგენლების მონაწილეობის შესაძლებლობა.

წადვლის თემის მოსახლეობას, პრობლემების ადვოკატირების მიზნით, შეხვდნენ საქართველოს რეგიონალური განვითარებისა და ინფრასტრუქტურის მინისტრის მოადგილე, მზია გიორგობიანი; პარლამენტის ადამიანის უფლებათა სამდივნოს წარმომადგენელი მერი ქაჯაია; გამყოფი ხაზის მიმდებარე სოფლებში დაზარალებული მოსახლეობის საჭიროებებზე რეაგირების დროებითი სამთავრობო კომისიის წევრი- გიორგი თუმანიშვილი.

შეხვედრა გაიმართა პროექტის „ადმინისტრაციულ სასაზღვრო ზოლიდან მცხოვრები ქალების მონაწილეობა კარგი მმართველობისთვის“ ფარგლებში, რომელსაც ახორციელებს „ქალთა საინფორმაციო ცენტრი“ ავსტრიის განვითარების სააგენტოს ხელშეწყობით.



ხაშურის მუნიციპალიტეტის საკრებულოს თავმჯდომარის მიხეილ ჯანაშვილის წლიური ანგარიში გაწეული მუშაობის შესახებ

ჩვენი მკითხველისათვის ცნობილია, რომ გასულ კვირას, ამომრჩეველთა ფართო აუდიტორიას, მიმდინარე წელს მუნიციპალიტეტის საკრებულოს მიერ გაწეული მუშაობის შესახებ, ანგარიში ჩააბარა საკრებულოს თავმჯდომარემ მიხეილ ჯანაშვილმა. დღეს, სწორედ ამ ანგარიშის სრულ ვერსიას გთავაზობთ.

მიმდინარე ანგარიში მოიცავს პერიოდს გასული 2018 წლის 31 ოქტომბრიდან 2019 წლის 24 ოქტომბრამდე.

საანგარიშო პერიოდში, ჩემი თავმჯდომარეობით, ჩატარდა საკრებულოს 12 მორიგი, 6 რიგგარეშე და 7 გადაუდებელი აუცილებლობიდან გამომდინარე სხდომა.

მიღებულია საკრებულოს ნორმატიული სამართლებრივი აქტი: 29 დადგენილება, 133 განკარგულება. გამოცემულია ინდივიდუალ-



ურ-სამართლებრივი აქტი: პირადი შემადგენლობის შესახებ - 94 და საერთო ორგანიზაციული საკითხების შესახებ - 65 ბრძანება.

- ჩატარდა სამანდატო, საპროცედურო საკითხთა და ეთიკის კომისიის 28 სხდომა;
- საფინანსო-საბიუჯეტო კომისიის - 30 სხდომა;
- სივრცით-ტერიტორიული დაგეგმარებისა და ინფრასტრუქტურის კომისიის - 26 სხდომა;
- ქონების მართვისა და ბუნებრივი რესურსების საკითხების კომისიის - 28 სხდომა;
- სოციალურ საკითხთა კომისიის - 26 სხდომა.

საკრებულოს კომისიები ერთობლივად მუშაობდნენ ისეთ მნიშვნელოვან საკითხებზე, როგორცაა ბიუჯეტის ფორმირება, მუნიციპალური ქონების საპრივატიზაციო გეგმის დამტკიცება, აგრეთვე, ხაშურის მუნიციპალიტეტის ტერიტორიაზე განსახორციელებელი ინფრასტრუქტურული პროექტები, ხაშურის მუნიციპალიტეტის ადმინისტრაციულ საზღვრებში დასახლების შექმნის შესახებ წინადადებების მოწონება და ქუჩებისათვის სახელწოდებების მინიჭება.

საქართველოს ორგანულ კანონთან „ადგილობრივი თვითმმართველობის კოდექსთან“ შესაბამისობაში მოყვანის მიზნით, ჩემი, როგორც საკრებულოს თავმჯდომარის, მიერ ინიცირებულ იქნა ცვლილებები „ხაშურის მუნიციპალიტეტის საკრებულოს რეგლამენტის დამტკიცების შესახებ“ ხაშურის მუნიციპალიტეტის საკრებულოს 2014 წლის 14 ივლისის 22 დადგენილებაში და აპარატის დებულებაში.

საკრებულოს მიერ მხარდაჭერილი საკითხებიდან გამოყოფილი რამდენიმე მნიშვნელოვან ინფრასტრუქტურულ პროექტს:

- თანხმობა მიეცა მუნიციპალიტეტის მერს „ბოჯინის წყლის სათავე ნაგებობის, მაგისტრალის, რეზერვუარისა და დასახლებების ჯგუფური მიწოდების სისტემების მოწყობის“ სამუშაოების შესყიდვის თაობაზე (2019 წლის 17 იანვრის განკარგულება №4); სოფელ ვაყაში გზის მოასფალტების სამუშაოების შესყიდვის თაობაზე (2019 წლის 5 თებერვლის განკარგულება №9); ხაშურის მუნიციპალიტეტის სოფელ ხცისიდან სოფელ კრისხევამდე გზის მოასფალტების სამუშაოების შესყიდვის თაობაზე (2019 წლის 5 მარტის განკარგულება №16); ქალაქ ხაშურში ბორჯომის ქუჩაზე ავტომანქანების გასწვრივ ღობეების მოწყობის სამუშაოების შესყიდვის თაობაზე (2019 წლის 2 აპრილის განკარგულება №33); სოფელ მცხეთიჯვრიდან სოფელ წაღვლამდე გზის მოასფალტების სამუშაოების განხორციელების გარიგების დადების თაობაზე (2019 წლის 27 მაისის განკარგულება №48); სოფელ ბეკამში და გვერდისუბნის დასახლებაში გზების მოასფალტების სამუშაოების განხორციელების გარიგების დადების თაობაზე (2019 წლის 2 ივლისის განკარგულება №62).
- 2019 წლის 7 მაისის №39 განკარგულებით, საკრებულომ მოიწონა ხაშურის მუნიციპალიტეტის ტერიტორიაზე, ამბულატორიული მომსახურების მიწოდების მიზნით საჯარო შენობების სარეაბილიტაციო სამუშაოების საპროექტო წინადადებები.
- დამტკიცდა საქართველოს მთავრობის 2018 წლის 28 დეკემბრის №654 დადგენილების საფუძველზე, ხაშურის მუნიციპალიტეტის

დასახლებებში განსახორციელებელი სოფლის მხარდაჭერის პროგრამის ფარგლებში, სოციალურ-ეკონომიკური პროექტების ნუსხა.

• აღდგება კიდევ ერთი ისტორიული სოფელი ულუმბო, რაც, დამეთანხმებით, მისასაღებელი ფაქტია. აღნიშნულზე შესაბამისი სამთავრობო კომისიისგან გვაქვს დადებითი გადაწყვეტილება, დარჩენილია მხოლოდ ადმინისტრაციული საზღვრებისა და სექმატური რუკის მომზადების სამუშაოები.

• საკრებულოს კომისიებისა და მერიის შესაბამისი სამსახურების ერთობლივი მუშაობის შედეგად, საკრებულოს 2019 წლის №55 განკარგულებით, 1993 წელს, აფხაზეთში, საბრძოლო მოქმედებების დროს დაღუპული მებრძოლის - უშანგი ბირკაძის სახელი მიენიჭა ხაშურში, ახალშენის ქუჩას.

თითოეული პროექტი, რომელიც მიმდინარე წელს განხორციელდა, დაგეგმილია მოსახლეობასთან უშუალო კომუნიკაციით, მათი მოთხოვნების და საჭიროებების გათვალისწინებით. მოვიარეთ ყველა სოფელი, შევხვდით მოსახლეობას და მათი დაკვეთა, შეძლებისდაგვარად, აფხაზეთ ბიუჯეტის დაგეგმვის პროცესში.

მუნიციპალიტეტში ყოველწლიურად მუშავდება და უმჯობესდება სოციალური და ჯანდაცვის პროგრამები, რომელთა მიზანია, რაც შეიძლება მეტი სოციალურად დაუცველი კატეგორია მოიცვას და იყოს მათს საჭიროებებზე მორგებული. აღნიშნულ პროგრამებს ამტკიცებს ხაშურის მუნიციპალიტეტის საკრებულო, ეს პროგრამები გახლავთ:

- „სოციალურად დაუცველი მოსახლეობის ფულადი სოციალური დახმარების 2019 წლის მუნიციპალური პროგრამა“ (დამტკიცებულია ხაშურის მუნიციპალიტეტის საკრებულოს 2018 წლის 14 დეკემბრის №108 განკარგულებით);
- „შეზღუდული შესაძლებლობების მქონე მოსწავლეთა სოციალური მომსახურების 2019 წლის მუნიციპალური პროგრამა“ (დამტკიცებულია ხაშურის მუნიციპალიტეტის საკრებულოს 2018 წლის 14 დეკემბრის №109 განკარგულებით);
- „ხაშურის მუნიციპალიტეტში კონფლიქტის მიმდებარე და მთიანი სოფლების საჯარო სკოლების პედაგოგების უფასო მგზავრობის უზრუნველყოფის 2019 წლის მუნიციპალური პროგრამა“ (დამტკიცებულია ხაშურის მუნიციპალიტეტის საკრებულოს 2018 წლის 14 დეკემბრის №110 და 2019 წლის 5 თებერვლის №7 განკარგულებებით);

• „უმწეოთა უფასო კვების 2019 წლის მუნიციპალური პროგრამა“ (დამტკიცებულია ხაშურის მუნიციპალიტეტის საკრებულოს 2018 წლის 14 დეკემბრის №111 და 2019 წლის 11 ივნისის №60 განკარგულებებით);

• „ხაშურის მუნიციპალიტეტის სახელოვნებო სკოლების დევნილი და სოციალურად დაუცველი მოსწავლეების უფასო მომსახურების 2019 წლის მუნიციპალური პროგრამა“ (დამტკიცებულია ხაშურის მუნიციპალიტეტის საკრებულოს 2018 წლის 14 დეკემბრის №112 განკარგულებით);

• „ხაშურის მუნიციპალიტეტის საზოგადოებრივი ჯანმრთელობის დაცვის 2019 წლის მუნიციპალური პროგრამა“ (დამტკიცებულია ხაშურის მუნიციპალიტეტის საკრებულოს 2018 წლის 14 დეკემბრის №113 განკარგულებით);

მუნიციპალიტეტის მერიასთან მჭიდრო თანამშრომლობით, გასულ წელს დაიწყო და წელს დასრულდა მუშაობა საადმინისტრაციო დაწესებულებების განვითარებისათვის საჭირო ერთიანი სტრატეგიაზე. მიმდინარე წლის სექტემბერში დამტკიცდა დირექტორის საკვალიფიკაციო მოთხოვნები, მომუშავე პერსონალის პროფესიული სტანდარტები, მონიტორინგის, შეფასებისა და ანგარიშგების სისტემა საკრებულოს 2019 წლის 3 სექტემბრის №20, №21 და 2019 წლის 1 ოქტომბრის №23 დადგენილებებით.

საკრებულოს კომისიების მიერ შემუშავებული წლიური გეგმების საფუძველზე დგება საკრებულოს კვარტალური სამუშაო გეგმები.

საკრებულომ მოისმინა და შეაფასა მუნიციპალიტეტის მერიის სტრუქტურული ერთეულების ანგარიშები, მათ შორის:

- ხაშურის მუნიციპალიტეტის 2018 წლის ბიუჯეტის შესრულების წლიური ანგარიში;
- § ხაშურის მუნიციპალიტეტის მერიის ეკონომიკური განვითარების სამსახურის მიერ 2018 წელს გაწეული მუშაობის ანგარიში;
- § ხაშურის მუნიციპალიტეტის მერიის შესყიდვებისა და მატერიალურ-ტექნიკური უზრუნველყოფის განყოფილების მიერ 2018 წელს შესყიდვების გეგმის შესაბამისად განხორციელებული შესყიდვების შესახებ ანგარიში;

§ ხაშურის მუნიციპალიტეტის მერიის განათლების, კულტურის და სპორტის სამსახური, განათლების და კულტურის განყოფილების მიერ 2019 წლის პირველ ნახევარში გაწეული საქმიანობის ანგარიში;

§ ხაშურის მუნიციპალიტეტის მერიის საბიუჯეტო სამსახურის ბუღალტრული აღრიცხვა-ანგარიშგების განყოფილების მიერ 2019 წლის პირველ ნახევარში გაწეული საქმიანობის ანგარიში;

§ ხაშურის მუნიციპალიტეტის მერიის შიდა აუდიტის სამსახურის მიერ 2019 წლის სამ კვარტალში გაწეული მუშაობის ანგარიში.

რაც შეეხება 2019 წლის ბიუჯეტზე მუშაობას, მის დაგეგმვასა და განხილვაში აქტიურად მონაწილეობდნენ საკრებულოს მუდმივმოქმედი კომისიები და ფრაქციები, რომლებმაც წარმოადგინეს შენიშვნები, რომელთა ნაწილი აისახა დამტკიცებულ ბიუჯეტში. ამჟამად მიმდინარეობს მუშაობა 2020 წლის ბიუჯეტის პარამეტრებზე.

• აქვე თვითკრიტიკით აღვნიშნავ, რომ ჯერჯერობით კვლავ დაბალია ბიუჯეტის პროცესში მოქალაქეთა ჩართულობის მაჩვენებელი. ეს აისხნება როგორც მოქალაქეთა დაბალი აქტიურობით, ისე მათთვის კანონით მინიჭებული ამ შესაძლებლობის შესახებ დაბალი ინფორმირებულობით. საჭიროა, მოსახლეობას მივაწოდოთ ინფორმაცია სამოქალაქო ბიუჯეტზე და მის მექანიზმებზე და, ამ მხრივ, სხვა მუნიციპალიტეტების გამოცდილებაც გავიზიაროთ.

მოგახსენებთ, რომ ხაშურის მუნიციპალიტეტში შექმნილია გენდერული საბჭო, გენდერული დისკრიმინაციის ფაქტების გამოვლენის, მათი აღმოფხვრისა და შესაბამისი ღონისძიებების განხორციელების კოორდინაციის მიზნით. როგორც აღნიშნული საბჭოს თავმჯდომარეს,

ნატარეული მაქვს საბჭოს 3 სხდომა და რამდენიმე შეხვედრა არასამთავრობო ორგანიზაციებისა და სახალხო დამცველის აპარატის წარმომადგენელთა მონაწილეობით. დამტკიცებულია 2019-2020 წლებში გენდერული თანასწორობის უზრუნველსაყოფად განსახორციელებელი სამოქმედო გეგმა, საკრებულოს 2018 წლის 14 დეკემბრის №130 განკარგულებით.

• მუდმივად ხდება ხაშურის მუნიციპალიტეტში არსებული გენდერული ვითარების, ქალთა პრობლემებისა და გამოწვევების, ასევე მუნიციპალიტეტის მიერ დაგეგმილი და განხორციელებული პროექტების ანალიზი გენდერულ ჭრილში.

• საბჭოს წევრებმა მოისმინეს მუნიციპალიტეტში ჯანდაცვისა და სოციალურ-საგანმანათლებლო სფეროში განხორციელებული მუნიციპალური პროგრამების გენდერული ანალიზი, რომელმაც აჩვენა, რომ 1600-ზე მეტი ბენეფიციარიდან, 60% ქალია.

• მუნიციპალიტეტის კულტურულ ცხოვრებაში მოქალაქეთა ჩართულობისა და შემოქმედებითი საქმიანობის უზრუნველყოფისთვის დახარჯული ბიუჯეტის ანალიზმა ასევე ქალთა აქტიურობას გაუსვა ხაზი.

• საბჭოს წევრები შეხვედრით საქართველოს სახალხო დამცველის გენდერის დეპარტამენტის წარმომადგენლებს, ე.წ. გამყოფი ზოლის მიმდებარე სოფლების: ჩორჩანისა და წაღვლის საინიციატივო ჯგუფების წარმომადგენლებთან ერთად, სადაც განვიხილეთ საზღვრისპირა სოფლების მოსახლეობის საჭიროებები აგრეთვე აღნიშნული სოფლების წარმომადგენელთა გენდერული საბჭოს შემადგენლობაში შეყვანის საკითხი. შედეგად, საბჭოს შემადგენლობას დაემატა სოფელ ჩორჩანის, როგორც გამყოფი ხაზის მიმდებარე სოფლის ქალთა წარმომადგენელი. უახლოეს სხდომაზე კი იგეგმება სოფელ წაღვლის წარმომადგენლის დამატება საბჭოს წევრად.

• არასამთავრობო ორგანიზაცია „ქალთა საინფორმაციო ცენტრმა“ პროექტ „ადმინისტრაციულ სასაზღვრო ზოლთან მცხოვრები ქალების მონაწილეობა კარგი მმართველობისთვის“ ფარგლებში, გამართა ტრენინგი ხაშურის მუნიციპალიტეტის გენდერული თანასწორობის საბჭოს წევრებისა და წაღვლის თემის საზღვრისპირა სოფლების მოსახლეობის ერთობლივი მუშაობის ხელშესაწყობად.

კანონმდებლობით დადგენილი წესით გამართულ საჯარო შეხვედრებზე მოვისმინე საკრებულოს 20 წევრის წლიური ანგარიში.

საკრებულოში დასაქმებული პროფესიული საჯარო მოხელეების პროფესიული განვითარების მიზნით, მათი პროფესიული უნარ-ჩვევების ამაღლების, წახალისების, პროფესიული განვითარების საჭიროებების განსაზღვრისათვის განხორციელდა მოხელეთა კომპეტენციების შუალედური შეფასება. საბოლოო შეფასების ჩატარება გათვალისწინებულია დეკემბრის თვეში.

როგორც საკრებულოს თავმჯდომარე, ვმონაწილეობ შიდა ქართლის სამხარეო-საკონსულტაციო საბჭოს სხდომებში, სადაც განვიხილავთ მუნიციპალიტეტში მიმდინარე საკითხებს და საჭიროებებს.

ღია შეხვედრების ფარგლებში, ხაშურის მუნიციპალიტეტის სოფლებსა და დასახლებებში მიმდინარეობს საკანონმდებლო და აღმასრულებელი ხელისუფლების, სამხარეო ადმინისტრაციის წარმომადგენლების და ადგილობრივი ხელისუფლების შეხვედრები მოსახლეობასთან. 50-მდე შეხვედრა ჩატარდა, რომლის მიზანია მოსახლეობის საჭიროებების, პრობლემების გამოვლენა და მათი გადაჭრის გზების ერთობლივად დასახვა.

ამ დღეებში, შეხვედრით მთავრობის მეთაურს, პრემიერ-მინისტრ გიორგი გახარიას, რომელმაც ადგილობრივი ხელისუფლების წარმომადგენლებისგან მოისმინა ინფორმაცია რეგიონში არსებულ გამოწვევებზე, რომელთა მოგვარება მხოლოდ ადგილობრივი ხე-

ლისუფლების ძალისხმევით ვერ ხერხდება. პრემიერის განცხადებით, ერთ-ერთი მთავარი მიზანია, ხელისუფლების მოქმედება უფრო ეფექტიანი გახდეს.

მუდმივად ვხვდები მოქალაქეებს განსაზღვრულ დღეებში, პირადად ვაცნობ მოსახლეობას ინფორმაციას ადგილობრივი ხელისუფლების მიერ გაწეული საქმიანობისა და დაგეგმილი პროექტების შესახებ. ჩავატარე 100-ზე მეტი შეხვედრა და შევხვდი 1500-ზე მეტ ამომრჩეველს. ახალგაზრდობასთან დიალოგის ფარგლებში, შევხვდი ხაშურის ილია ჭავჭავაძის სახელობის 3 საჯარო სკოლის უფროსკლასელებსა და სამოქალაქო განათლების პედაგოგ გიორგი გოგინაშვილს, გავეცანით მათ მიერ წამოჭრილ საკითხებს და ვესაუბრეთ მათი გადაჭრის გზებზე.

მნიშვნელოვანია მონაწილეობა ისეთ ღონისძიებებსა და აქციებში, როგორებიცაა: 22 აპრილს იმერეთის ქუჩაზე მდებარე ახლადამშენებულ სპორტკომპლექსის ეზოში გამწვანების აქცია, მსოფლიო კამპანია - „დავასუფთავოთ მსოფლიო“, დაბა სურამში, სახელმწიფო ტყის ფონდის ტერიტორიაზე ხეების დარგვა გარემოს დაცვისა და სოფლის მეურნეობის სამინისტროს წარმომადგენლებთან ერთად.

ვმონაწილეობდი სხვადასხვა ფორუმებსა და შეხვედრებში. მოკლედ მინდა შევეხოს იმ შეფასებებს, რომელიც საკრებულომ არასამთავრობო ორგანიზაციების და საერთაშორისო ინსტიტუტების კვლევებით მიიღო.

ინფორმაციის „თავისუფლების განვითარების ინსტიტუტის“ (IDFI), კონსულტაციის და ტრენინგის ცენტრის (CTC) და მმართველობითი სისტემების განვითარების ცენტრის (MSDC) მიერ ჩატარდა 2019 წლის ადგილობრივი თვითმმართველობის ინდექსის კვლევა. ინდექსი სწავლობს და აფასებს საქართველოს მუნიციპალური ხელისუფლების გამჭვირვალობას, მოქალაქეთა მიმართ ანგარიშგაღებულობასა და გადაწყვეტილების მიღების პროცესში მოსახლეობის მონაწილეობის ხარისხს.

საქართველოს მუნიციპალიტეტების გამჭვირვალობისა და ანგარიშგაღებულების 2019 წლის ეროვნული შეფასების შედეგების მიხედვით, შეფასების 100%-იან შკალაზე, ხაშურის მუნიციპალიტეტის საშუალო შედეგი 31%-ია, რაც 8%-ით აღემატება 2017 წლის ანალოგიურ მაჩვენებელს (23%). უშუალოდ საკრებულოსი, კი - 41%-ია.

საჯარო ინფორმაციის პროაქტიული გამოქვეყნების ინდექსში მუნიციპალიტეტის მაჩვენებელია 23%.

ელექტრონული მმართველობის ინდექსში 40%, აქედან საკრებულოს და კომისიების სხდომების გამოქვეყნება-100%.

მოქალაქეთა მონაწილეობა და ანგარიშგაღებულება-50%, მათ შორის საკრებულოს სხდომებში მოქალაქეთა მონაწილეობა-30%, საჯარო ინფორმაციაზე ხელმისაწვდომობა - 80%, სოციალურ ქსელებში მუნიციპალიტეტის აქტიურობა - 100%.

ყველა პარამეტრს არ ჩავუღრმავებთ, აღვნიშნავთ ერთს, რომ აღნიშნული კვლევით, ხაშურის მუნიციპალიტეტი ღიადერია შიდა ქართლის მუნიციპალიტეტებს შორის. თუმცა ეს არ გვაძლევს მოდუნების უფლებას, პირიქით, გვაძლევს სტიმულს, რომ რეკომენდაციების გათვალისწინებით, ვიქცეთ უფრო გამჭვირვალე, ანგარიშგაღებულ და პროგრესულ თვითმმართველობის ორგანოდ, ვინაიდან ძლიერი თვითმმართველობა და ძლიერი მუნიციპალიტეტი არის ძლიერი ეკონომიკისა და ძლიერი ქვეყნის წინაპირობა.

დაბოლოს, მადლობა მინდა გადავუხადო საკრებულოს მთლიან შემადგენლობას, მუნიციპალიტეტის მერიას და საკრებულოს აპარატს, პარლამენტის წევრის ბიუროს თანამშრომლობისათვის.

მერიის ადმინისტრაციული სამსახურის შესყიდვებისა და მატერიალურ-ტექნიკური უზრუნველყოფის განყოფილების მიერ 2019 წლის 9 თვეში გაწეული მუშაობის ანგარიში

ხაშურის მუნიციპალიტეტის მიერ 2019 წლის I - III კვარტალში გამოცხადებული იქნა 148 ტენდერი საერთო ღირებულებით 15 980 074.78 ლარზე, საიდანაც 91 დამთავრდა დადებითი შედეგით, ტენდერებიდან ეკონომიამ შეადგინა 1 749 097.16 ლარი. გამოცხადებული ტენდერებიდან არ შედგა 28 ტენდერი, 12 ტენდერი დასრულდა უარყოფითი შედეგით, 6 ტენდერი შეწყვეტილია, ხოლო 11 ტენდერი მიმდინარეა (გამოცხადებულია, ან/და შერჩევა-შეფასების ეტაპზე).

ხელშეკრულებით ნაკისრი ვალდებულებების არაჯეროვანი შესრულებისთვის და ხელშეკრულებით დადების უფლების მოპოვების მიზნით, არაკეთილსინდისიერი ქმედების ჩადენის გამო, 2019 წელს ხაშურის მუნიციპალიტეტის მერიამ სახელმწიფო შესყიდვების სააგენტოს წერილობით მიმართა 6 შესყიდვასთან დაკავშირებით, რათა ელექტრონულ ტენდერში მონაწილე მიმწოდებლები დარეგისტრირებულნი ყოფილიყვნენ შავ სიაში და სააგენტოს მიერ მოხდა შესაბამისი რეაგირება, ხოლო ერთი კომპანიის საკითხის განხილვა მოხდება სასამართლო დავის გზით. აღსანიშნავია, რომ შავ სიაში დარეგისტრირებულ პრეტენდენტს/მიმწოდებელს შავ სიაში რეგისტრაციიდან ერთი წლის განმავლობაში არ აქვს უფლება მონაწილეობა მიიღოს სახელმწიფო შესყიდვაში და დადოს ხელშეკრულება.

პრეტენდენტების მიერ გასაჩივრებული იქნა 4 ტენდერი: „სოფელ ხცისიდან სოფელ კრისხევამდე გზის მოასფალტების სამუშაოების შესყიდვა“ და „ხაშურის მუნიციპალიტეტის სოფელ ვაყაში გზის მოასფალტების სამუშაოების შესყიდვა“ შპს „ლეური“-ს მიერ, „2019-2020 წლების განმავლობაში ხა-

შურის მუნიციპალიტეტში განსახორციელებელი 50 000 ლარზე მეტი ღირებულების ინფრასტრუქტურული ობიექტების საპროექტო-სახარჯთაღრიცხვო დოკუმენტაციის ინსპექტირების ანგარიშის (ექსპერტიზა) და სამშენებლო სამუშაოებზე სახელამხედველო მომსახურების გაწევა, ასევე, 2019 - 2020 წელში დაწეული და მრავალწლიანი სამშენებლო სამუშაოების სახელამხედველო მომსახურება სამუშაოების დასრულებამდე“ და „2019-2020 წლების განმავლობაში ხაშურის მუნიციპალიტეტში განსახორციელებელი 50 000 ლარზე მეტი ღირებულების ინფრასტრუქტურული ობიექტების საპროექტო-სახარჯთაღრიცხვო დოკუმენტაციის ინსპექტირების ანგარიშის (ექსპერტიზა) და სამშენებლო სამუშაოებზე სახელამხედველო მომსახურების გაწევა, ასევე, 2019 - 2020 წელში დაწეული და მრავალწლიანი სამშენებლო სამუშაოების სახელამხედველო მომსახურება სამუშაოების დასრულებამდე შპს „ოპტიმალ გრუპ“+-ის მიერ, თუმცა ოთხივე მათგანში საჩივარი ნაწილობრივ დაკმაყოფილდა.

2019 წლის I - III კვარტალში გაფორმდა ხელშეკრულებები ჯამური ღირებულებით 15 640 107.94 ლარი

ხელოვანიშნული შესყიდვებიდან, გამარტივებული შესყიდვის საშუალებით, გაფორმებულია ხელშეკრულებები 1 379 129.62 ლარის შესყიდვაზე, ფაქტობრივად გადახდილმა თანხამ შეადგინა 923 252,26 ლარი;

ელექტრონული ტენდერების საშუალებით გაფორმებული ხელშეკრულებების ჯამმა კი შეადგინა 14 260 978.32 ლარი, ფაქტობრივად გადახდილი თანხაა -7 881 832,74 ლარი

2019 წლის I - III კვარტალში განხორციელდა 4 მრავალწლიანი შესყიდვა 5 737 053,09 ლარის ტენდერებზე, რომლის მიწოდების ვადად განისაზღვრა 2020 წელი.

თ. ხაჩიძე,
მერიის ადმინისტრაციული სამსახურის შესყიდვებისა და მატერიალურ-ტექნიკური განყოფილების ხელმძღვანელის დროებითი მოვალეობის შემსრულებელი

ხაშურის შემოვლითი გზის 13 კილომეტრიანი მონაკვეთის მშენებლობა 2020 წელს დასრულდება

2020 წლიდან რიკოთის, ქვეშეთი-კობის და საერთაშორისო მაგისტრალური გზების სხვა მონაკვეთების მშენებლობა აქტიურ ფაზაში გადავა. ამის შესახებ რეგიონული განვითარებისა და ინფრასტრუქტურის მინისტრის პირველმა მოადგილემ, საავტომობილო გზების დეპარტამენტის თავმჯდომარე ირაკლი ქარსელაძემ პარლამენტში, საკომიტეტო მოსმენაზე განაცხადა.



ამ დროისთვის ჩქაროსნული მაგისტრალების ნაწილში აშენებულია 200 კმ გზა და სამუშაოები მიმდინარეობს 140 კმ-ზე.

„მიმდინარე წელს აქტიურად მიმდინარეობს საქართველოს მთავარი საგზაო მაგისტრალების 60, 70 და ჩრდილოეთ-სამხრეთის (ჟინვალი-ლარსი) ჩქაროსნულ გზატკეცილად მოდერნიზების პროექტები.

ამ დროისთვის ჩქაროსნული მაგისტრალების ნაწილში აშენებულია 200 კმ გზა და სამუშაოები მიმდინარეობს 140 კმ-ზე, 2020 წელს აქტიურ ფაზაში გადადის რიკოთის, ქვეშეთი-კობის და საერთაშორისო მაგისტრალური გზების სხვა მონაკვეთების მშენებლობა, სამუშაოები იწარმოებს 175 კმ. გზაზე, რომელთა ჯამური ღირებულება 5 მილიარდ ლარს შეადგენს“, - განაცხადა ქარსელაძემ.

მისი თქმით, მიმდინარე წელს, სამუშაოები დაიწყო რიკოთის უღელტეხილის ხევი-უბისას და უბისა-შორაპანის მონაკვეთებზე, გაფორმდა ხელშეკრულება პირველ ლოტზე და მეოთხე მონაკვეთზე კი მიმდინარეობს სატენდერო შერჩევა-შეფასების პროცედურები. წლის ბოლომდე აქაც დაგეგმილია ხელშეკრულების გაფორმება.

„ამასთანავე, 2020 წელს დაგეგმილია სხვადასხვა მონაკვეთების დასრულება, მათ შორისაა ხაშურის შემოვლითი გზის 13 კმ-იანი, ქუთაისის შემოვლითი გზის 41 კმ-იანი, სამტრედია-გრიგოლეთის გზის 14 კმ-იანი მონაკვეთები,“ - აღნიშნა ირაკლი ქარსელაძემ.

საავტომობილო გზების დეპარტამენტის მიმდინარე პროექტებზე დასაქმებულია 9000-ზე მეტი ადამიანი და მაგისტრალური პროექტების განვითარებასთან ერთად, ეს რიცხვი მნიშვნელოვნად გაიზარდება, რაც მნიშვნელოვანია როგორც ადგილობრივი მოსახლეობის დასაქმების, ისე კვალიფიკაციის ამაღლების თვალსაზრისით.

ჟურნალის „გზავნილი ხაშურიდან“ პრეზენტაცია

28 ოქტომბერს, ხაშურის №1 საჯარო სკოლაში, გაიმართა ჟურნალს „გზავნილი ხაშურიდან“ პრეზენტაცია. აღნიშნული ჟურნალის წარდგენა, უკვე მოხდა თბილისში და მკითხველს მიეცა შესაძლებლობა, უფრო ახლოს გაეცნო ჩვენი მუნიციპალიტეტი, აქ მცხოვრები ადამიანები თავისი ყოფითა და ცხოვრებით. თბილისიდან, ემოციის გაზიარება, უკვე ჩვენს საზოგადოებასაც ერგო წილად. ჟურნალის წარდგენას, ის რესპონდენტებიც ესწრებოდნენ, რომელთაც ცხოვრებამ და საქმიანობამაც ასე საინტერესო საკითხავი გახადა ჟურნალი. როგორც ჟურნალის რედაქტორმა და თბილისის სახელმწიფო უნივერსიტეტის ასოცირებულმა პროფესორმა მაია ტორაძემ ჩვენთან საუბარში აღნიშნა:

–2013 წლიდან გამოდის ჟურნალი „გზავნილი“ და ბეჭდური მედია-პრაქტიკუმის ფარგლებში, სტუდენტები ჩაგვყავს სხვადასხვა რეგიონებში, სადაც ეცნობიან იქ არსებულ მდგომარეობას, ეძებენ და ხვდებიან საინტერესო ადამიანებს, რესპონდენტებს, ეგუებიან გარემოს. ამ შემთხვევაში, შევარჩიეთ გზავნილი ხაშურიდან. მონაწილე სტუდენტები მხოლოდ გავლით იყვნენ ნამყოფი ხაშურში და თითქმის არაფერი იცოდნენ ხაშურზე. გადავწყვიტეთ, გვეჩვენებინა ხაშური ისეთი, როგორც ის რეალურადაა. თბილისში გამართულ პრეზენტაციაზე, გამომსვლელებმა მადლობა გადავცინადეს იმისთვის, რომ გავაცანით მათ ეს მუნიციპალიტეტი სხვა კუთხით. ჟურნალის ამ ნომერზე იმუშავა 11-მა სტუდენტმა, ფოტოები და ჟურნალის გარეკანი ეკუთვნის ლიანა მარქარიანს. ჟურნალის გარეკანზე დაბე-



ჭდილმა ფოტომ, გაიმარჯვა საუკეთესო ფოტოს კონკურსში. დღევანდელი ჩვენი მიზანია, იმ ადამიანებს, რომლებმაც დახმარება გაგვიწიეს, რომლებიც მონაწილე არიან ჟურნალის შექმნის, ვაჩვენოთ, რა პროდუქტი შეიქმნა. მინდა, მადლობა გადავუხადო, მერიისა და საკრებულოს საზოგადოებასთან ურთიერთობის სამსახურს, №1 საჯარო სკოლის დირექტორს და უამრავ ადამიანს, რომ არა მათი თანადგომა, ჟურნალი ასეთი საინტერესო და კითხვადი არ იქნებოდა.

„ათასწლეულის ფონდმა“

ახალი კონკურსი გამოაცხადა

26 ოქტომბერს ათასწლეულის ფონდმა ათასწლეულის ინოვაციის კონკურსის გამოცხადებისა და STEM მენტორთა

კლუბის დაარსების ღონისძიება გამართა, სადაც მოეწყო წინა წლების კონკურსების ფინალისტების პროექტების გამოფენა. ღონისძიებაში მონაწილეობა მიიღო ხაშურის I საჯარო სკოლის პედაგოგმა ნანა დაბრუნდაშვილმა, რომელიც მსგავს პროექტებში ბევრჯერ მონაწილეობდა და წარმატებითაც. კონკურსის მიზანია სკოლის მოსწავლეების ინტერესის და მოტივაციის ამაღლება საბუნებისმეტყველო მეცნიერებების, ტექნოლოგიების, ინჟინერიის (STEM) და ინოვაციების მიმართ.

კონკურსში გამარჯვებული, პირველ ადგილზე გასული გუნდი 2020 წელს გაემგზავრება ASA-ს კოსმოსური ცენტრის უნივერსიტეტში და მონაწილეობას მიიღებს ცენტრის სასწავლო პროგრამაში. ხოლო მეორე და მესამე ადგილზე გასული გუნდები მიიღებენ სპეციალურ ჯილდოებს.

ათასწლეულის ინოვაციის კონკურსი 2014 წლიდან ხორციელდება საქართველოში აშშ-ის საელჩოს ფინანსური მხარდაჭერით. პროექტის მხარდამჭერია საქართველოს განათლების, მეცნიერების, კულტურისა და სპორტის სამინისტრო. კონკურსში დღეისათვის 1500-ზე მეტ მოსწავლეს აქვს მონაწილეობა მიღებული. ღონისძიების ფარგლებში გამოცხადდა STEM მენტორების კლუბის დაარსება, რაც კიდევ უფრო შეუწყობს ხელს ინოვაციებსა და ტექნოლოგიებში ახალგაზრდა გამოგონებლების მოზიდვას და მათი პროექტების, იდეების განხორციელებას





შემოდგომა ჩვენს მუნიციპალიტეტში. ცხრამუხა. ბადრი ვადაჭკორიას ფოტო.

**- იუმორი -
ქართლში გავრცელებული
ზედმეტსახელები
(ნაწილი მესამე)**

ჩვენი მკითხველი, გაზეთის წინა ნომრებში, გაეცნო ქართლში გავრცელებულ ზედმეტსახელებს, რომლებშიც, იუმორთან ერთად, დიდი შინაარსიც დევს. სტატიებს დიდი გამოხმაურება და მოწონება ხვდა წილად. მას შემდეგ, ზოგი ჩვენივე მოძიებით, ზოგიც მკითხველთა დახმარებით, ზედმეტსახელთა “კეისი” კიდევ შეივსო და დღეს მორიგ “მარგალიტებს” გთავაზობთ.

პლაცკაპლუცკა გრიშა-ხეში ჩარჭობილ ნებისმიერ ლურსმანს შიშველი თითებით აძრობს.

კუჭშიგაუსვლელი ანტონა—210 კილოა.

იმავე სოფელში ცხოვრობს ფანერკა გივი-მთელი ცხოვრებაა 40-დან 45-კგ-მდე მერყეობს.

ორნახადი მურადი-ჯერ ბავშვობაში ჩავარდა ღორის გასაფუფქ ქვაბში, შემდეგ-დილობაში, ორივეჯერ გადარჩა.

უთავო მხედარი პალიკო—სსრკ-ის დროს, კოლმეურნეობაში, მეველე მუშაობდა, რამდენჯერ ცხენზე ამხედრდა, იმდენჯერ ან ხეს შეასკდა, ან ჩამოვარდა.

არსაკიძე ბუხუტი—კომუნისტების დროს, სახლი ააშენა, პირველი სართულის სიმაღლე 2 მეტრი და 30 სანტიმეტრი იყო, მაშინდელმა აღმასკომმა გააფრთხილა, დაწიე სიმაღლე, თორემ დაგაჯარიმებთო, არ შეეპუა. მარტო ჯარიმა კი არა, სამი წელი ციხეც ახეხინეს, მოკლედ, ხელი არ მოაჭრეს, მაგრამ რატომ კარგი ავიგიო და დასაჯეს.

იჭაური სამსონა-ბავშვობაში რაღაც ვირუსი შეეყარა და მას შემდეგ სულ მკვდრის ფერი აქვს.

შტირლიცა ბადრი-გერმანელი ცოლი ჰყავს, გვარად მიუღერი.

თავდადებული ალიოშა-რაღაც დაავადება ჭირს და დღე-ღამეში 16-17 საათი ძინავს-თავი სულ ბალიშზე უდევს.

ერთგული შოთა-ბოზი ცოლი ჰყავს, თვითონაც იცის, მაგრამ ვერ ელევა.

აშშ ამირანი-ამირან შოთას ძე შეუკაკიძეა.

წულწულა კობა-შვიდი შვილი ჰყავს, შვიდივე გოგო.

პუსტა-პუსტა დარიკო—სამჯერ გათხოვდა და შვილი არ გაუნდა.

ტორეადორი ვაჟა-ბუღა ჰყავდა გიჟი, ვერ აკავებდა კაციშვილი, სამჯერ ჩაუღლეწა ნეკნები პატრონს.

ჯაყო გოდერძი-სოფელში ერთ მოხუცთან იქირავა ოთახი და იმდენი მოახერხა, რომ ბოლოს ეს სახლ-კარი მისაკუთრა.

ღმერთგამწყურალი გუჯა-სამჯერ დაეცა მესი, არ მოკლა, მაგრამ ნახევრად გამოაჩერჩეტა

სამოცდაცხრიანი ბადურა—რაც სისქე აქვს, ის სიმაღლე-გინდ შეატრიალე, გინდ შემოატრიალე, იგივეა.

ხერგიანი სოსო-სოფლის ბოლოს, მთის წვერზე აიშენა სახლი.

ვალიდოლა ლამარა—როცა რამე საქმეა, იმ წუთს, გულზე იკიდებს ხელს და ირიდებს.

ჟოფრეი მიტო-ღრმა ნაიარევი აქვს ღოყაზე და ოდნავ კოჭლობს.

ანუელიკა მარგალიტა, მიტოს ცოლია.

ნატურალური ელიკო-სოფელში ორი ელიკოა, ერთი სულ ქალაქშია და სილიკონით დაიბერა ყველაფერი.

ბროლოსნის საჯარო სკოლის პედაგოგები და ტექპერსონალი თანაუგრძნობენ მანანა აბაზაძეს მეუღლის სოსო (იოსებ) კაპანაძის გარდაცვალების გამო.

საქართველოს პედაგოგთა და მეცნიერთა თავისუფალი პროფკავშირის ხაშურის რაიონული ორგანიზაცია, თავმჯდომარე ინეზა ელისაშვილი, სამძიმრს უცხადებს განათლების რესურსცენტრის მთავარ სპეციალისტს, ქალბატონ მანანა აბაზაძეს მეუღლის სოსო კაპანაძის გარდაცვალების გამო.

D

ა(ა)იპ ხაშურის მუნიციპალიტეტის გაზეთი „ხაშურის მოამბე“. დირექტორი გიორგი გოგალაძე, მისამართი: ხაშური, ტაბიძის ქუჩა №2. ტელეფონი: 24 30 27.
E-mail Khashurismoambe2015@gmail.com მიმღების დასახელება: ხაზინის ერთიანი ანგარიში, საიდენტიფიკაციო კოდი 443860984, სახელმწიფო ხაზინა TRESGE22, სახაზინო კოდი: 749547499.
D-ით მონიშნული სტატია იბეჭდება დაკვეთით გაზეთი იბეჭდება თბილისში. რედაქტორი რობერტ სუხიაშვილი.